



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tiryimym@aolima



tir yimym

TAPAK 7



## Djokovic ATP Cincinnati Open nung masayatsü

## Bangladesh chief justice-i mapa nungi anentsü mulunga agizükogo



VOL. XXI ISSUE NO. 299 (ADOK 299)

DIMAPUR

AMUNGNÜ (SUNDAY)

LUROI (AUGUST) 11, 2024

₹ 5.00

## Ao Senden-i tax mesarudaktsütsü

**Dimapur, August 10, 2024 (TYO):** Ao Senden-i NSCN (K) Isak dang Mokochung District nung tax mesarutsü atema tetuyuba agütsüogo.

Isak-i aniba NSCN (K) ajanga August 7, 2024 nü osangkaket nung Mokochung

District nung tax sarutsü indang sangdong ka agütsüogo. Ajisüaka Mokochung District nung kija, shishilembar shinga dang nungi tax mesarudaktsütsü ta Ao Senden-i Honibarnü sangdong ka ajanga metetdaksüogo.

## Jenang tur ayokertem merenshitsü: MCCI

**Dimapur, August 10, 2024 (TYO):** Truck kiburtemi gari lenmang majungba atema lungkak aitiba nungi tajangzük agia Mokochung jila nung shishilembar jenang tur mayoktsüla ta Mokochung Chamber of Commerce & Industry (MCCI)-i metetdaksüogo.

"Shishilembar jenang tur ayokba angashir aser iba inyakyim Mokochung nung magizüksü. Anungji jenang tur ayokba shishilembar iba inyakyim anentsü tetuyuba agütsür. Tanü nübertemi tayongzükba tulu ajurua lir

anungji teblemtsü khuret abenba sensotem ama asenoki asen customer tem yaritsüla" ta MCCI-i sangdong ka nung ashi. Mokochung nung shishilembar kari dang tim masüba inyakba putetra temerenshi alitsü. Iba mapa inyakerteri ozüing tsütsü timtem majurudang pei sasa dokantem shibangtsüla ta MCCI-isa ashi.

Maneni, public-i iba ama inyakyim osang MCCI Office den 9436006062; 9436442800; 9436605461 ajanga lemsateptsü ayongzük ta parnokisa metetdaksüogo.

## NSCN/GPRN-YA aser ULFA(I)-i I-Day mokdangtsü

**Dimapur, August 10, 2024 (TYO):** NSCN/GPRN aser ULFA (Independent) teloktemi August 15, 2024 India Independence Day mokdangba metetdaksüogo.

India-i ano maneni Wesea region nung tashiyim agi par taila Independence Day sayutsü sentong renemer. Anungji onoki August 15 anepdang 1:00 ako nungi aonung 6:00 ako tashi Assam, Manipur, Nagaland aser Arunachal Pradesh ajunga mokdangtsü ta MIP, NSCN/GPRN-YA-i sangdong ka nung ashi.

Ajisüaka iba tenokdangba kübok emergency services, media aser tamangba yimsü dak sendakba maparen madener, ta parnokisa ashi.

'One People One Region One Vision' tangatetba nung onoki Wesean nung nüjiso meimba senso

ajaki iba anogo magizüksü aser onoki ayonga mokdang pusema kidang dang amongtsü ayongzük ta NSCN/GPRN-YA-i ashi.

India-i Wesean region nung alirtem taginübatem maneni ajembanga yur alima ashioptsür. India-i Wesean region nung tensa süngjema lira ma sayur saka ibaji tiyazü. India-i sepaitem tashi amshia inyaker, meimchir temeten anema inyaker aser policy tamajung atonga maparen inyaksangshir ta parnokisa ashi.

Wesea region nung tashiyim agi Indian Independence Day benjung amongba ajanga asenok küm aka India kübok aliba nenshia metetdaksür. Iba ya Wesea nung taginüba mezügmeshiba inyakyim ka lir aser Wesean revolution tapak iba anogo ya 'Black Day' ta züngshitsü ta NSCN/GPRN-YA-isa metetdaksüogo.

## Kohima atema traffic tetuyuba agütsür

**Dimapur, August 10, 2024 (Agencies):** August 10 nungi 14, 2024 tashi Box Cutting Road Kohima nung mapa inyaksü anungji August 10 aser 11 anogotem iba lenmang shibangtsü ta Kohima Deputy Commissioner Kumar Ramnikant-i ashi.

August 12 nungi 14 tashi tsünglangleni aluba garitem asoshi lenmang lapoktsütsü. Anungji iba mapang Ladies Mile Road aser NHAK-TCP gate ajanga senzütsü metetdaksür ta Kohima DC-isa ashi.

Maneni, paisa National Highway 29 (NH-29) Kohima-

Dimapur Road nung anentsüh aluba atema tekümdangtsü metetdaksüogo.

Tzünglu kanga aruba ajanga highway nung gari senzüba nung timtem ajurur. Dzuchie, Dzudza (GREF Temple) aser Kezanu, Jotsoma (Old KMC dumping site) nung lenmang kanga mejungi raksa lir aser lenmang sadema lapoktsü atema mapa inyakdar, ta DC Ramnikant-i ashi.

Anungji lenmang sadema melapok tashi public-i iba lenmang nung senzüdang kanga kümdangtsü metetdaksür ta paisa ashi.

## Mokokchung - Dimapur NST night bus service tenzükshir



NST bus tasen ka meshitetba den Mokochung - Dimapur NST night bus service tenzükshiba sentong nung shilem agia adenertem külemi tangokba noksa nung angur. (Mokochung, 10th August, 2024)

**Mokokchung, 10th Aug (TYO):** Timtem kar aliba ajanga Mokochung nungi Dimapur aonung senzüba NST bus night service taküm January nungi anener liasüba Aug 10, 2024 aonung nungi tanaben asendenshia tenzükshigo. Iba mapa taneben tenzükshiba ajanga nüburtem jenti tajangzük angutsü imlar.

Hopta nung asemben night service jajatsü. Ibaji Dimapur - Mokochung Hombar (Monday), Bodbar (Wednesday) aser Hogulbar (Friday) jajatsü, aser Mungulbar (Tuesday), Brihostibar (Thursday) aser

Honibar (Saturday) Mokochung - Dimapur jajatsü, ta Mokochung AGM, Kevichutuo Sekhose-i Mokochung station nung sentong tongmelang ka akadang metetdaksü.

Nagaland nung station 5 nung Bs 6 engine aketba bus tasen kaka agütsü, iba nungji tia junga Mokochung station-a densemba asoshi Advisor aser department nung ketdangsurtem dang pelaba Mokochung AGM-isa metetdaksü. Sungkomen Baptist Arogo, Asst. Pastor, Matsüing Longkumer-i iba bus tasenba meshitettsü.

Wokha ajanga senzüdang gari para ji senpak 450/- aser Amguri ajanga senzüdang senpak 550/- asütsü. Khenpika atema hopta nung asemben senzüa atatsü saka passenger alinungbo meilongi anogoshi jajatsü teblemba lir, ta Mokochung AGM-isa ashi.

Nisung aikadi NST bus-tem ya meima mamshir, iyongji gari yakta raksatoker, anungji, tang nungi NST bus ajak pei meyong ama bilema meima amshidaktsünür, ta NST nung inyaker kadi iba osangbener den jembidang nüburtem dang temepishiba ka lemsatep.

## Nagaland MP-i 'Frontier Nagaland Territory' atema jembibi

**Dimapur, August 10, 2024 (TYO):** Eastern Nagaland People's Organisation (ENPO)-i mapang talangba Frontier Nagaland Territory (FNT) tentettsü akhangba atema Centre-i mapa inyaksü ayongzük ta Lok Sabha MP S. Supongmeren Jamir-i ashi.

Lok Sabha nung urgent public importance atema olemtepdang

Supongmeren-i iba onük benoka jembibi aser Centre dang nangzükba ama meinyakra Naga nung tsüingda meputep adoktsü ta ashi.

India sorkari Eastern Nagaland nung dang nangzükbatem mapa küma meinyakra atema mepelar. Iba onük atema mapang shitak nung mapa meinyakra Nagaland nung timtem adoktsü akok ta

paisa ashi.

Supongmeren-isa Union Home Ministry dang Centre, State sorkar aser ENPO tsüingda sign sütepa Draft of the Memorandum of Settlement aser Draft of Working Paper (DWP) indang osang metetnua asüngdangogo ta Communications Department, NPCC sangdong ka nung ashi.

## Khensa nung Seri-Tourism Model Farming Centre lapokogo



**Dimapur, August 10, 2024 (TYO):** August 10, 2024 nü Sericulture & Minority Affairs Advisor Imkongmar-i Khensa nung Seri-Tourism Model Farming Centre lapoktsüogo.

"Tanü anogo ya yangi sentepa alir ajak asoshi teti bilemtettsüba anogo ka lir kechiyong asenok külemi merangba ajanga Sericulture project inyaktetogo. Iba ya Nagaland nung mezüing lir aser ni pungmanga aruba ka asangsang nung atalokogo" ta Advisor Imkongmar-i ashi.

"Seri-Tourism Model Farming centre ya recreational centre ka ama dang masü saka semdangi arurtemi Sericulture indang maparen balala metettsüba centre

ka asütsüla. Sericulture ajanga sen aazüksüba lenmang aliba sayutsüla" ta pai ashi.

"Iba Centre ya takok ngua inyaksangshia aoba ajanga tarutsü nung ano iba mesükba centre tem lapoktsü ajungmesotsü. Khensa aser iba anasa aliba yimtsüngtemi teyari agütsüba atema kanga pelar aser iba mapatong ajanga asen loktiliba nung tajangzük bentsür arutsü imlar" ta Advisor Imkongmar-isa ashi.

Sentong nung Sericulture Director Sanjay Rai-i okila jembidang iba mapatong ya NEC 2023-2024 schemes kübok senotsü agütsü ta ashi.

Iba centre ajanga tourist tem atsür aruba dang masü saka

Model Farming Centre nung Sericulture maparen balala ajanga mapa adoktsü ta Rai-isa ashi.

"Iba ya pungmang ka asangsang nung atalokba lir. Council-i lateta yutsüba alema inyakerteri ozüing tapet agi merenshitsü" ta Khensa village Council chairman I. Alemmeren Longchar-ia ashi.

Sentong nung mendenji Sericulture department Deputy Director Alemkumzuk liasü, Ongpangkong Compound Baptist Church pastor Puryapang-i temoatsü meshia sarasadem, District Sericulture Officer Mokochung Imonger-i anküp tepela o jembibi aser Khensa Baptist Church pastor Mayanger Walling-i sarasadema tembang.

# Nagaland State Bharat Scouts & Guides Award Ceremony agiogo



**Dimapur, Luroi/August 10 (TYO):** Nagaland State Bharat Scouts and Guides Award Ceremony, August 9 nü Dr. Imkongliba Ao Hall, Raj Bhavan, Kohima nung agiogo.

Sentong nung o jembiba mapang Nagaland Angh La Ganesan, shiba Chief Patron, NSBSG lir, pai Bharat Scouts & Guides ya lanurtem atema voluntary non political, educational movement ka lir, koba tebandang kecha makai ajak atema sadema lapokja lir aser iba lokti tentet ngutetsang (1907) Lord Baden Powell-i benokba purpose, principles aser inyakyim dak ajemdaker inyaksangshir, ta ashi.

Iba movement nukjidongji lanurtem khuret angatetba lisopur ka ama anitetsü asoshi teyari agütsütsü atema lir. Angh-i ashiba agi Scout & Guide Movement ya "duty to God, duty to others aser duty to self" principles dang amendaker lir aser iba ya alima ajunga nung prokshia or lir.

Rajya Puraskar, koba Scouts & Guides atema state level nung naroküm tematiba lir iba atema taküm Dimapur, Kohima aser Wokha districts nungi Guides 18, Scouts 14, Rover 1 aser Ranger 2 qualify asüba atema kanga pelaba

Angh-i lemsatapa laisü.

Paisa item Rajya Puraskar Scouts, Guides, Rovers aser Rangers tem President award angutsü imla ataba lemsatap, koba linük nung Scout, Guide, Rover aser Ranger tem atema tetushi tematiba lir. Paisa naroküm agizükertem nem parnoki meranga bendanga agüja inyakba atema tenünsang agüja liasü.

Maneni Angh-i, Sikkim nung 2024 küm January 12 nungi 16 tashi 7buba North East Mini Jamboree agiba mapang 2nd runner up anguba ajanga Nagaland State Bharat Scouts and Guides nem tenünsang agüja liasü.

Anghi-sa, Life Member aser taoba Vice-President, State Commissioner (Guide) and State Organizing Commissioner (Guide) Sano Vamuzo nem Padmashree award agütsüba atema tenünsang agüja liasü.

Sentong nung Nagaland Angh La Ganesan-i, awardees tem nem Rajya Puraskar certificates agütsü aser Advisor, YRS & President, NSBSG, S. Keoshu Yimkhiung Tritiya Sopan certificates agüja liasü.

Tritiya Sopan ya district level nung Scout/Guide atema

rank tematiba lir. Dimapur, Kohima, Mokochung aser Wokha nungi Scout 20 aser Guide 30 Tritiya Sopan 2024 atema qualify süa liasü.

Rajya Puraskar koba dang GOVERNOR'S AWARD ta ajar iba ya State Level nung Scout/Guide/Rover/Ranger atema tetushi tematiba lir. Taküm Scout 14, Guide 18, Rover 1 aser Ranger 2 (Dimapur, Kohima aser Wokha) GOVERNOR'S AWARD 2024 atema qualify süogo.

Awardees ajak (Tritiya Sopan aser Rajya Puraskar) iba award angutsü atema training aser tetandangba balala agiogo. District balala nung professionally trained lenir aser Examiner temi parnok formal aser informal topics aser syllabus balala nung tendangogo.

Tetandangba atema syllabus ya Bharat Scouts and Guides India National Headquarters-i agütsür.

Rajya Puraskar awardees tem National level nung temaba award atema renemtsü.

Sentong nung Vice President, NSBSG, Dr. Joyce Z. Angami-i lokti pela agizükba o jembiba aser Director YRS & Vice President, NSBSG-i tepela o jembiba liasü.

# Clinical Spa lapoker küm 8 jungogo



**Dimapur, Luroi/August 10 (TYO):** Clinical Spa lapoker küm 8 ajunga anogo parnok indang brand tanaben amenokshioigo aser original HydraFacial (alima nung leading medi-facial) densema medi-facial aesthetic treatments aika agütsüba facility ka tang mezüngbuba Nagaland nung amenokogo.

Facility tasenba ya Family Health Clinic, Nagarjan Junction, Dimapur kolak nung lir, koba Dr. Theyiesinuo Keditsu, Lecturer, Dept. of English, Kohima College, Kohima-i lapokja liasü.

Iba facility tasenba bendanga agüja Pastor Brian-i sarasadem.

Iba sentong nung Sashila Ozukum, School Administrator, Hope Academy Dimapur aser designer Bambi Kevichusa nungeria shilem agia liasü.

Proprietor Dr. Kahuka Sema-i ashiba agi, Clinical Spa-i medical-grade products tem aser international jenjang nung agizükertem aliba device tem dang agütsür.

Medi-facials ya tanga facials dang nungi tajungba ta züngshir aser aikati iba ya ang sakloker, kechiyong iba ajanga pigmentation, acne, scars aser wrinkles amala tajungba kumdaktsür. Medi-facials ya shi teküp tapu balala ajak atema

tapet aser mapang talang ka alir aser trained aesthetician mesüra physician-iang agütsür.

Normal skin atema session kajia teperi, saka result tajungba asoshi session aika agütsü nüngdaktsü. Treatment ya nisungshia pei teküp dak ajemdaker balala asütsü, kong microdermabrasion, chemical peels, radiofrequency aser laser amala treatment densema alitsü akok.

Clinical Spa- agütsüba tanga medi-facials tem rongnung Dermalogica, ZO, Venus Viva, Diamond Glow aser Vampires facials densema lir. Facial ya sen 999 nungi tenzüksü.

# MULUNGNEN O



November 1925 - August 01, 2024.

NI ASOSHI TAKÜM ALIBAJI KHRISTA, ASER TASÜTSÜJI TAJANGZÜK - PHILIP 1:21

Ozü Tsürabur Arishir L. TONGPANG LONGCHAR (99) LIRMEN, Asa-taopi yipden nung alidang aser iba akümüli toktsür-KIBUBA den teti tepela dak alitsü aoba anogo tashi onok den kija, kibong aser lokti balalai asükhu mapang, nübo, rongsen aser tamang sarasadem agi yaritepba Mulungnen o. Pai toktsür aoba kinünger tanabuba Semchir tashi agi nenok sobaliba mapa tajung mamatsü. Tsüngremi moajangma.

**Alakteta lokti aser kija dang pelaba kar yamai shisemer:**

1. Lirmen Yimten aser Arogo
2. Akumen Yimten aser Arogo
3. Tsüremmen Yimten aser Arogo
4. Wameken, Tzüdikong anükapangtem
5. Kijikina Yim 4-5 nungi aser Assam artsü n
6. Lirmen Küzbar tebo semchirtem
7. Shri Imna Along Lkr, Minister Govt of Nag
8. Er. Chubatoshi & Team
9. Shri Imdong President JSS
10. Ano mayimjamba tembatinurtem

- Ojala aser Chirnurtem

# BJP Mahila Morcha State Executive senden menogo



**Dimapur, Luroi/August 10 (TYO):** Bharatiya Janata Party, Mahila Morcha State Executive Meeting senden August 8 nü Longmikaba, Mangkolemba (org) District nung menogo, kong District balala nungi tir tem, General Secretary tem, State Executive züngsemtem aser alakteta jaokertemi shilem agia liasü.

State President Mahila Morcha Shanbeni Yanthan-i o jembiba mapang, iba lokti tentet tashi, tinyaktsü aser party karayakartas tem ama khuret indang lemsatap. Laisa, BJP ya cadre based party ka lir ta shia, Mahila ajak dang nendaka aser bendanga inyaktsü ajungshia liasü.

Ato Kilonser Narindra Modi lenisüba nung India sorkari welfare schemes balala agütsüogio aser iba ajanga linük nung etsür crore aika ajanzükogio. Centre nung sorkari tetsürtem aser parnok terenlok atema inyaksangshia arudar, kong rongsenketzung nung teyari agütsüba aser telemtetba agiba lokti tentet balala nung züngoksemba densema lir, ta lai ashi.

Shanbeni-isa, Chief Minister Neiphui Rio-i aniba PDA sorkari Nagaland nung Urban Local Body nung menden 33 mekazüka toktsüogio, ta ashi.

Senden nungsa state Mahila Morcha-i, Chief Minister

Neiphui Rio aser Deputy CM aser BLP Leader Y. Patton nati aniba Nagaland sorkar maneni nongita yaritsü bangjem. Tanabuba nung parnoki ULB election nung takok anguba tetsürtem ajak nem tenünsang agütsütsü aser "Women Empowerment" atema maneni bendanga agüja inyaktsü bangjema liasü.

Senden ya President BJPMM wokha Caroline Patton lenisüba nung agi aser Longmikaba Nagamese Baptist Church pastor Imlinukshi-i Tsüngrem temaotsü meshizüka sarasadema liasü. Sentong nungsa President BJP Mangkolemba (org) District Tali imchen-i lokti pela agizükba o jembiba liasü. Maneni Bandangyanger-i o tatsüka jembiba aser Swapana Dewan, Secretary BJPMM Nagaland-i report agütsüba den Amenla Longchar, President BJPMM Mangkolemba (org) District-i tepela o jembiba liasü.

Tanabuba session ya Suzzane Konyak, President BJPMM Mon District lenisüba nung agi. State President BJPMMN-i maparen tajungtiba benoka inyakba district asem; Mon District BJPMM, Wokha District BJPMM aser Zunheboto District BJPMM nem naroküm agütsü aser iba sülen onük balala benoka sensaksema liasü.

### PM Modi-i Wayanad nung anentsüh lendong atalokba tesem semdang



August 10, 2024 nü Ato kilonser Narendra Modi-i Wayanad district nung anentsüh lendong atalokba tesem semdangba sülen pai ketdangsertem den senden amendang tangokba noksa nung angur. Noksa nung Minister of State, Suresh Gopi, Kerala Governor Arif Mohammed Khan aser Kerala Chief Minister, Pinarayi Vijayan nungera angur.

#### New Delhi, Luroi/August 10

(Agencies): Honibarnü Ato kilonser Narendra Modi-i Kerala kübok Wayanad district nung tawa anentsüh lendong tulu atalokba tesem tayimtsü nungi repranga asadangba sülen anentsüh lendong atalokba tesem semdanga teyari agütsüba maparen asadangogo. Tayimtsü nungi lendong atalokba tesem repranga senzüdang Modi den Kerala Chief Minister, Pinarayi Vijayan-a liasü. Iba sülen Modi-i lendong atalokba tesemtem-Punchirimattam, Mundakkai aser Chooralmala semdangba den külemi iba lendong nungi jemburtem ajurua jembi. Ketdangsertemi iba lendong atalokba, kümzükba maparen inyakba aser teyari agütsüba maparen osang tejangja Modi nem metetdakja liasü. Ato kilonserisa relief camp aser hospital semdanga iba lendong nungi jemburtem ajurua jembiba sülen pa leniba nung

review senden ka amen. Senden nungji Ato kilonser Modi-i, anentsüh lendong agi kongshirtem yaritsü aser taküm asentenshir yangershitsü atema Centre sorkari akokba tashi yariteptsü, ta metetdaksü. Narendra Modi meyipa aoba sülen osangbenertem den jembidang State Public Works Minister, P A Mohammed Riyas-i, anentsüh lendong atalokba tesem nung sen crore 1,200 shi takoksa nguogo aser takoksa angurtem taküm taneben asentenshir yangertsü atema sen crore 2,000 agüjang ta mepishiogo, ta metetdaksü. Julo 30 anepdang Wayanad district kübok Chooralmala aser Mundakkai na nung anentsüh lendong tulu atalok. Iba lendong nung asürtem tasümang 226 den temang shilem 403 ngutetogo aser samaba nisungtem aika mangur. Kerala yimtiba, Thiruvananthapuram nung osangbenertem den jembidang

Chief Minister Pinarayi Vijayan-i, state sorkari Centre sorkar dang iba lendong ya 'national disaster' ta sangdongang ta mepishiogo, ta metetdaksü. Kerala state sorkari iba lendong agi kongshirtem nem teyari agütsütsü aser tesem tajung ka nung jila tasen ka tentetsütsü, ta sangdongogo. Mundakkai aser Chooralmala na nung kibong nung tambutisang nem anogo shia sen 300 teyari agütsütsü. Iba teyari ya kibong shia nung nisung anana nem agütsütsü. Ano iba lendong nung kanga mejungi yirua kidang yipten nung mesüra hospital nung mapang talangka amongtsüpur kibongtem nungbo kibong shia nisung asemsem nem teyari agütsütsü. Iba teyari ya anogo 30 nü agütsütsü. Ano tang relief camps nung jenoka alirtem nem khen atema sen meyirjang terer (10,000) agütsütsü, ta state sorkari sangdongogo.

### Hindu nunger aikati India-Bangladesh arrtsü adena aittsü merang

New Delhi, August 10 (Agencies): Hokolbarnü West Bengal kübok Cooch Behar district kübok Sitalkuchi nung Bangladesh nunger meyirjang aika, talisa Hindu nungertemi India telungi aittsü merangba ajanga tensa raksa.

Hindu nunger teimba ser Bangladesh nungertemji arrtsülen aliba atsü nungi metre 400 shi dang pilar Bangladesh nung Lalmonirhat district kübok Genduguri aser Doikhawa yimtsüng na nung adenshia liasü. Parnoki arrtsü adena India telungi aittsü merang saka Border Security Force (BSF) sepaitemi parnok nokdanga liasü.

BSF nungi 157 Battalion sepaitem aika Pathantuli yimtak lemmükja lir aser parnoki tetsüng agi aser gari naprongla nung senzüa arrtsü nükdar.

Bangladesh nungertem jagi tejashi nung India telungi aiddakjang, ta mepishia yimyim ayim.

Iba tatalokba dak sendakba nung BSF ketdangser kati, Bangladeshi nunger aika arrtsülen adenshia liasü, saka BGB-i parnok soit, ta metetdaksü.

"Bangladeshi nunger aika

arrtsü nung adenshi saka parnok shingaia linük telungi maittet, kechiyong arrtsü shibanga lir. Tesülen BGB-i parnok pei linüki anir ao," ta pai metetdaksü.

Tesülen BSF Guwahati Frontier-i sangdong ka ajanga, iba ya arrtsülen tayongzükba tasen ka lir, ta metetdaksü.

"Tang tayongzükba ya BSF atema tayongzükba tasen ka, kechiyong BSF sepaitem ya Bangladesh aser Pakistan den arrtsülen India security atema lemmüktsüba sepaitem lir. Arrtsülen security atema inyakba den külemi meimchir dak sendakba tebilemstü atema inyaksü ya mapa kanga tasak," ta kasa sangdong ajanga metetdaksü.

Tesüiba hopta asem tashi Bangladesh nung kaketshirtemi sorkar anema longkak sashia aiddang nisung 400 dak tema süogo. Tesüsa Sheikh Hasina-i Ato kilonser menden toktsür ajentsüsa aküm. Tang tashi Bangladesh nung tensa majungba aser Muslim nungertemi minorities anema inyakba ajanga tesüiba anogo ishika Bangladesh nungertemi arrtsü adena aita India nung jenoktsü meranger.



August 10, 2024 nü Ranchi nung Jharkhand Chief Minister aser JMM lenir, Hemant Soren-i party nung lenirtem den pa asoba anogomong benjung amongdang tangokba noksa nung angur.

### August 12 tashi Himachal aser state aika nung tzunglu arutsü: IMD

New Delhi, August 10 (Agencies): India Meteorological Department (IMD)-i Himachal Pradesh densema state aika atema 'orange alert' sangdongogo; Himachal Pradesh tesem aika nung August 12 tashi tzunglu sashia arutsü, ta parnoki metetdaksüogo.

IMD-isa, Himachal Pradesh, Uttarakhand aser Rajasthan tesem aika nung August 12 tashi tzunglu sashia arutsü aser August 10 nü Jammu and Kashmir, Haryana, Punjab aser Chandigarh nunga tzunglu arutsü, ta metetdakja liasü. Iba dak alia IMD-i region

kar nungbo anentsüh lendong ataloktsü aser tzunglu sashia aruba ajanga ali nung aonsotsü aika raksatsütsü aser kanga nemzüka aliba tesemtem nungbo tzü metsüngtsü, ta metetdaksüogo. IMD-isa Delhi nunga taruba anogo ana tashi tzunglu arutsü, ta metetdaksü.

### Uttar Pradesh nung tetsür 9 tepsetba ken o nung aibelener ka puogo

Lucknow, August 10 (Agencies): Uttar Pradesh kübok Bareilly nung tetsürtem kanga sempar tebur kati ita 14 tsüngda tetsür 9 tepsetba sülen tesüsa police-i pa puogo.

Arrshi küm 35, Kuldeep Gangwar ya Nawabganj nungi lir aser pai Shahi-Sheeshgarh area nung tetsürtem tepsettsü atema maongka bushia tetsür aika tepset.

Gangwar-i tetsür ajakji alenseta südaksüba sülen tasümgangtemji mochi-lu nungsa indoka liasü. Pai tetsür trok tepsetbabo police-i jangjaogo aser tetsür asem tepsetba ken o nunga pa dak melung malamer.

Taoba mapang Gangwar tebui tetsü dak kanga azükba pai aiben tenük agi kuli süa angu aser pa kinüngtsüüa pa toktsüba sülen nungi pai tetsür ajak sempa.

Iba mapang nungjagi tenzükba pai tejashi nung kija alir

tetsürtem bushia alenseta südaksü.

Gangwar-i talisa arrshi küm 45-55 tsüngdapur tetsürtem tepsettsü bushi, kechiyong tetsü rabitsürlajia arrshi küm 50 shi liasü.

SSP, Anurag Arya leniba nung 'Operation Talaash' kübok tesüsa police-i Gangwar apu.

Tetsür aika parnoki agia agiba sari agi alenseta südaksüba sülen tasümgangtemji mochi-lu nungsa anguba ajanga item tatalokba ajaki nisung ka mapa lir ta bilema liasü.

Shahi-Sheeshgarh area nung alirtemi mapang shia nisung tasen ka alu balala nung nemzüa senzüa anguba sülen parnoki police nem iba osangji metetdakja liasü.

Kuldeep Gangwar apuba ajanga Bareilly nung alir tetsürtem aika melung süngzükogo, kechiyong parnok aika tetsüba nung lia aruogo.



New Delhi, August 10, 2024: Centre sorkari Manipur nungi Assam Rifles sepaitem anitetsü telemtetba agiba anema Honibarnü New Delhi nung Kuki Students' Organization-i longkak aiddang tangokba noksa nung angur.



## TIR YIMYIM YIMOBILEM (EDITORIAL)

DIMAPUR AMUNGNÜ, AUGUST (LUROI) 11, 2024

### Sayatenya dak kija mamangba tamang

**A**tangji, asenoki amangba Yehovah Tsüngrem ya sayatenya Tsüngrem lir. Ajisüaka, Pa dang sayatenya ka sayutsü atema asüngdangbaji asen tamang ilaba temaitsü asütsüa akok. Tsüngrem dak jungjunga mamangertemi teti Tsüngrem nem sayatenya inyadaktüner. Aji oda, nisung aikati Tsüngrem dang sayatenya mapa inyaksü asüngdangbaji tamang uluba agi inyaker amai bilemtsüa akok. Ano, karibo Tsüngremi teti sayatenya mapa inyaka sayutsü amai bilemer. Item purtem jagi shirangertem ajunga sayatenya agi aneptsü amai bilemer, mesüra tensa tia tamajung ajak nungi sayatenya agi kümzüksü amai bilemer. Ajisüaka, parnok temulungjang nungbo Tsüngrem dakbo mamanger. Anungji, kenü anogo Farisi aser Sadukitem Yisui dangi orr Pa atidanga, parnoki pa dang anüng nungi temaitsü ka sayuang ta asüngdang. Idangji, Yisui langzü, " tamajung aser nüktapangta putui temaitsü bushir, saka Yona temaitsü dak alema parnok nem kecha temaitsü magütsütsü. Aser Pai parnok toktsür ao." Iba tatalokba ya asenoki Laishiba Mathi tapu 16 nung shia angur. Item ama anemsü nisung, Tsüngrem dakbo mamanger saka sayatenya temaitsü angutsübo imlartem Yisui aitsür, kechiyong Pai parnok temulungjangji meteta lir. Item ama nisungtem jagi sayatenya anguba mapang aser anogo nungbo Tsüngrem dak amangtsüa akok, saka iba mapang aser anogo süitemerbo Tsüngremji amadoker. Iba jagi Yisui asenok toktsür aor. Atangji, tanü putu nunga asenok ya Tsüngrem dak masü sayatenya dak amangba purtem lir. Asenok anema junga ali tashi mashimashi alitsü, asenok kaa-itta ali tashi asenoki Tsüngrem mebiletettsü, asenok lendong timtem ka agi menokdang tashi asenoki sarasademtsü mebiletetter. Ajisüaka, kodang asenok shirangdir, sayatenya agi anepner aser timtem lendong ajurudanga sayatenya nung kümzükner. Idangjibo, Farisi nungertemi meshiba amaji asenoki sayatenya meshir. Item ama purtem dang tamajunger aser nüktapangta benschirtem ta ajar aser Pai asenok toktsür aor. Aiben asenoki tanüla sempet aketer jaa Tsüngrem dang asenok asoshi sayatenya meshidaktür. Ajisüaka, Laishiba ashir, Yona nem agütsüba temaitsü dak alaka tanga temaitsübo magütsütsü. Tetezü Tsüngrem dak mamanger ser nung sayatenya meshirtem asoshi Yona nem agütsüba temerenshi temaitsü dang angutsü. Tsüngrem dak amangba tamang jenjang asadangba nungbo, Tsüngrem nungi sayatenya memeshiba aser sayatenya dak mamangba tamangjiang tuluba lir ta angateter. Iba ama tamang tulu agi alima chuba tsüngdang tamangertem Shadrach, Meshach aser Abednego nungertemi jembiba tatalokba ka Daneil tapu 3 nung shia angur. Parnoki Nebuchadnezzar chuba dang ashiba o nung, par aseme Yihovah Tsüngrem dak amangba tamang jenjang jangjangjaa angur. Par aseme chuba dang ashi, " Oh, chuba, ajiang, ozü Tsüngrem shiba onoki tenzüker, Pai milak adoka aliba misem nungi onok kümzüksü koka lir, aser Pai onok nü ket nungi kümzüksü. Aji oda, mesüaka, oh, chuba, nai ya metetang, onoki nü tsüngremtembo metenzüksü aser nai yangluba hon süngyangluji mekülemtsü." Daneil medemer par aseme parnoki amangba Tsüngremi parnok alima chuba ket nungi kümzüksü ta kanga junga amanga liasü. Ajisüaka, par aseme Nebuchadnezzar dang ashiba dak alaka, Tsüngrem dang par asem kümzüksüsa alima chuba matsüngdang sayatenya inyaka sayuang ta masüngdang. Ajisüaka, parnoki ashi, Tsüngremi parnok alima chuba ket nungi meküzmükyonga, tanga alima tsüngremtembosa mekülemtsü. Iba tamangji koda tulu aser koda jangratemtsüka. Asenokia, Tsüngrem dak amangtsü asoshi sayatenya nungdaker asü, mesüra Pai sayatenya mesayuaka, pai maneptsüaka, mesüra Pai alima lendong nungi meküzmüka, Kibuba Tsüngrem daksa amangtsü ta shitetter. Joko, ibai sayatenya dak amangba putu masü saka Tsüngrem dak amangtsüba putu. Sayatenya dak amangba agi masü saka Tsüngrem dak amangba agi asen temang aser tanüla kümzüker.

## OLEMSABANG

### NAGA NUNGER LANURTEM-IA SAISAPONG NUNG MONGIN KÜMA ASAYATSÜLA

~ L. Kika Pongener

Tanü putu nung saisapong (Games and Sports) ya kangasa tongtipang ka kümogo. Sorkar mapa mesura Company mapa nung meinyak-aka, sai-sapong nung mongin küma asayaba agi takar küma alir aika lir. Ano tazünga Degree tulu meliaka, sai-sapong nung National & International level tashi nung junga asayartembo ayung-ayunga kibong/taküm mesua litettsüba mapa tajung rongnung ka kümogo. Asen Naga nunger balaka kaketshir tazünger ajunga nukjidongji, sorkar mapa ka bushir itasen chia alitsü, iba nukjidong nungji dang rangloker azünger. Ajisüaka, tanü putu nung joko, tazünger ajakbo Sorkar mapa agi atatsü masüji, lanur aika lenmang balala nung Degree tulu zünger tsürabur nem timtem agüja kidang kazüa aliba angudang kanga sasaa repranger. Ano tesasatsüka, lanur karbo Degree tulu zünger, mozü (Drug) chia aser yi jema taküm lisa-a aliba angudang kanga sasaa repranger. Aji oda, lanur ka Degree tulu ngua azüngtsüsa pa/la dak tekolok shisatsü meliaka, mesura pa/la dak tangar ama mapa tulu inyaktettsüsa sempet (Talent) meliaka, pa/la aso-ajen (Physical health) agi tangar menepa temsua lira, saisapong nung temulong agüja, meranga asayanung, ibajagi kibong/taküm ayung-ayunga, chiyunga-jema takar küma alitsüsa lenmang sadem-sadema dang lir. Akhi putu nungbo saisapong ya temang anema alitsü asoshi 'Physical Exercise' mapa ka dang amai benschia aruogo, saka tanü putu nungbo sai-sapong ya kibong aser taküm mesua alitsüba 'Employment' & 'Profession' tongtipang mapa ka kümogo. Anungji Naga nunger lanurtem-ia sai-sapong nung temulong kanga agütsütsüla...Kechi mapa sudir suaka nisungi temulong agüja meranga inyaker makoktsüba mapa kecha maka.

Tanü India nung 'India Super League' Football asayaba nung North East India nungi Manipur, Mizoram aser Meghalaya State nungibo Team balala nung asayar karbo dena lir. Ano 'North East India Team' nung tanga State nungibo asayar karbo dena lir, saka asen Naga nungerbo team ka nunga asayar dena mali sudi. Ano Indian Premier League (IPL) Cricket asayaba nunga Naga nungerbo asayar ka danga dena mali sudi. India Foot ball Super League aser Indian Premier League, Cricket asayaba nung ya asayartem aika crorer meden tashi agi Club-temi alizükba angur. Manipur, Mizoram aser Meghalaya nungi Football asayartem Club balala-i sen lakh 50-60 tashi agi alizükba asayar karbo lir. Ano Indian Hockey Team nunga tebur aser tetsür team anaprongla nung Manipur & Mizoram nungibo asayar karbo lir. Asen Naga nunger daka sempet (Talent) lir, aser temang shi (Physical Health) parnok ama asenoka temsua dang lir sernung, kodaser asenokibo tangar menepa masayateter (?) Kechiba asen Naga nungerbo National & Inter-National level tashi nung asayatsüsa madoker (?)...ta kanga nemjema bilemer. Asen Naga nunger-a küm tepiyong District ajak nung Foot ball, Volley Ball, Badminton etc. Tournament ayongzüka asayar, saka National & International level tashi nung asayar madoktsüsa kechi tai ???...ta nemjema bilemer. Tawa-anogo ishika tejaklen-ang European Cup, Copa America Cup Football asayaba aser Crikete World Cup asayaba alima ajungai jangradema reprangtepogo. Iba Cup asemprongla asayaba nung Team ajunga nung asayartem-to takar tesa lir. Parnokbo asayaba kisung agi kibong aser taküm mesua takar küma alir. Ano tang France lima Paris yimti nung Olympic asayaba jangradema reprangtepdagi. Iba Olympic asayaba nung Manipur, Assam, Meghalaya, Mizoram State nungibo asaya tapu balala nung asayar karbo dena lir. Lanurtem aika National & International level tashi asayaba nung Medal ngua pei lima nem konang-nungsang bentsür aruba agi Sorkar-i senpet sen lakh aika agütsüba agi takar akümba, ano karbo sorkar mapa nung tulus menden (Gazzeted Post) tashi nung appointment agütsüba-a lir.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# India nung missionary tem anema inyakba Arogo lenirtemi aitsür



August 09, 2024 nü Jharkhand yimtiba, Ranchi nung tribal nisungtemi International Day of the World's Indigenous Peoples anogomong amongdang tangokba noksa nung angur.

August 10, 2024: August 09, 2024 nü India nung tribal nisungtemi International Day of the World's Indigenous Peoples anogomong amongba sülen Hindu yimsü alia amangertemi Khristan missionary tem nem tai tongloktsü.

Akhil Bharatiya Vanvasi Kalyan Ashram (all India tribal welfare body)-i, India nung bendangertem aser Khristan missionary temi iba anogomong benjung nungtem nung loktiliba nung telemsa adokdaksütsü meranger, ta tai tongloktsü.

Iba organization ya Rashtriya Swayamsevak Sangh (RSS) den affiliate süa aliba telok ka lir.

August 08, 2024 nü Akhil Bharatiya Vanvasi Kalyan Ashram Tir, Satyendra Singh-i, iba anogomong benjung ya America, Australia, New Zealand aser Canada ama linüktem atema lir, iba benjung ya India denbo mapet, ta metetdakja liasü.

"Iba linük nung nisung ajakji lisopurtem lir, aser tangbo asenok British nung yimsüsüba kübok masü," ta

Singh-i metetdakja liasü. Taküm iba anogomong omenji 'Protecting the Rights of Indigenous Peoples in Voluntary Isolation and Initial Contact' liasü, aser iba ya tamangba yimsü kecha den-a sendaktepa mali, ta Khristan putir, Vincent Ekka-i metetdaksü.

"Khristan missionary temi asalentong yanglur inyaker, ta tai tongloktsübaji tiyazü lir," ta August 9 nü Jesuit putir, Ekka-isa metetdaksü.

Ekka ya New Delhi nung aliba Arogoi ketdangsuba Indian Social Institute nung tribal studies department nung tongti lir.

Paisa, tribal nisungtemi pei temeden meteta akümtsü aser pei temeden atema ola adoktsü, ta Hindu teloktemi tsübur, ta ashi.

RSS-i India nung Khristan missionary temi tribal nüburtem tenzüka aruba aser tribal nisungtemi Khristan yimsü agizükba anema nokdaker.

RSS den affiliate süa aliba organization balalai linük tesem ajaklen Ghar Wapsi (homecoming) ayongzüka tribal nisungtem aser Dalit nungertem

tanaben Hindu yimsü dangi meyipdaksür.

Chhattisgarh nung Oraon tribal nungi lenir, Ekka-isa, "Khristan missionary tem nem tai tongloktsüba ya yimtenren tsütsü parnok tebilemba ataloktsü atema lir," ta ashi.

Nütsüng billion 1.4 aliba India linük nung nütsüng shilem 8.6 bo tribal nisungtem lir.

Jharkhand nung taoba mapang tribal advisory committee nung züngsem, Ratan Tirkey-i, "Khristan missionary tem anema RSS aser parnok den sendaktepa aliba teloktemi mapang shia asalentong balala benoker," ta ashi.

"Khristan missionary temi tribal nisungtem atema mapa tajung aika inyakba ya parnoki (RSS) reprangtettsü asü?" ta paisa asüngdang.

"Terenlok tenüng atemer tribal nisungtem parnok li nungi meindoker. Asenok (tribals) temeden metettsü aser asen nüburtem nem parnok temeden metetdakja ola adoktsü atema mapang tongogo," ta Jharkhand yimtiba, Ranchi nung Archbishop, Vincent Aind-i metetdaksü.

## ANOGO ABEN TSÜNGREM DEN

### YIMJUNG ASOSHI SARASADEMBA

*Yirusalem yimjung asoshi sarasademang; Na meimertem azükarudakjangma. T.Ken 122:6*

Yirusalem yimti dang akhi mapang nungi Tsüngremi shimtetba yimti, Temeshi yimti ta ja-a aru, kong asen Kibuba Yisu Khrista mapang nunga nungtoku yimti ta angshia yangji pai mapa tulu inyaba lai o nung aiben shia lir. Saka iba yimti aiben tsükchirtemi ma-aka liasü kechiaser Israel nungertemi aiben Tsüngremi parnok dang meimba ama meliteti Tsüngrem jashidaksü.

Asen taküm, nübortemia aiben Tsüngremi meimba ama melitetba ajanga Pa jashidaksür. Tsüngrem den yimjung meliteta nisung den yimjung nung alitsü makok. Tsüngrem aser Pai yanglubatem den yimjung nung melitet tashi yimchi-yimjung aser azükaru nung alitsü makok. Kong teputep, tepela, tesünep, kati ka taoba ta bilemba, ochi aser tila küma ajemaluba lir yangji Tsüngrem adener, Pa tatenba nung teti yimjung aser azükaru alir. Ajaki yimjungbo aginür saka yimjung meimba shisatsü asen dak melira kibong aser lokti nung yimjung alitsü tamakoktsü.

Ajaki meimba aser aginüba koba "AZÜKARU" lir, iba temoatsü yabo Tsüngrem nungi dang angutsü, iba asoshi temulung temerük ajanga yimjung shisatsü meshia sarasademdi.

# Azerbaijan nung Armenian Khristantem kanga reshikangshir: ICC

Washington, D.C, August 10 (Agencies): Tawa International Christian Concern (ICC)-i US sorkar ketdangsertem dang Azerbaijan aser yangji Armenian Khristantem puoka aliba jail ketdangsertem anema tenokdangba balala agüjang, ta mepishiogo.

ICC-i Global? Magnitsky? Human Rights Accountability Act kübok U.S. Department of State aser U.S. Department of Treasury dang Azerbaijan anema inyaksü mepishi.

ICC-i Azerbaijan nung US telungi maitdaksütsü aser parnok meyong kiojen/rongsenkettzüng soita ayutsüla, kechiyong Azerbaijan nung meimchir temeden anema inyaker, ta metetdaksü.

ICC-i Azerbaijan nung 2020

küm nungi 2021 küm tashi Armenian Khristantem rara mapang apuba sülen jail nung reshikangshiba bushisüngdanga liasü.

Azerbaijan nung Armenian Khristantem mapang talanglang reshikangshiba aser ibaji sorkaria pusemba kuli aika ICC-i ngutetogo.

ICC nungi bushisüngdangertem tongtii, jail tem nung ketdangsertemi Armenian Khristantem dak tim mesüi benschir aser kanga reshikangshir, ta metetdaksü.

Alima puti otsü nung Khristan linük tejentiba Armenia ya Europe aser Asia na tsüngda lir, aser parnok meketa tsükchirtem linük aika lir. Talisa Muslim nütsüng teimba aliba linük Azerbaijan nung mapang talangka kijai yimsüsüba Aliyev kibong lir

aser tang Tir, Ilham Aliyev yimsüsüba kübok-a Armenia Khristantem kanga reshikangshir.

Akhidang nungi Azerbaijan nung lenirtemi Armenian aser Armenian Khristantem kanga sempar aser reshikangshir.

Azerbaijan-i Nagorno-Karabakh region (Artsakh taka ajar) atema Armenia den mapang talangka raraogo. Tesüsa 2020 küm September ita nung Azerbaijan sepaitemi tangar teyari agia Artsakh nung Armenia sepaitem amak.

Russia-i tiyongtsüi ia inyakba ajanga mapang tatsüka yimjung liasü, ajisüaka Azerbaijan-i ita 9 tashi Artsakh mokdangba sülen yaküm September ita nunga Artsakh region ajak agiadokogo.

Iba mapang nungji Armenia nung 100,000 dak tema

prokshiogo.

ICC-i ashiba agi, 2020 küm Nagorno-Karabakh War mapang nung apuba Armenian Khristantemji Baku Pre-trial Detention Center aser Military Disciplinary Unit na nung puoka lir.

ICC-isa US ketdangsertem dang Baku Pre-trial Detention Center aser Military Disciplinary Unit na nung lenir pezü anema tenokdangba agüjang, ta mepishiogo.

2022 küm U.S. Department of State report ka ajanga, "Azerbaijan sepaitemi ozüng alema nisung tepseter aser September ita nung Armenia nung sepaitem dak taochi mesayui benschio," ta metetdakja liasü.

Linük anapronglai European Court of Human Rights nung kati ka anema ken o benoka

liasü.

United States Commission for International Religious Freedom (USCRIF)-ia 2024 küm report ajanga US state department dang, Azerbaijan ya yimsü temeden anema inyakba linük ka lir, anungji iba linük ya Countries of Particular Concern (CPC) nung züngokang, ta mepishiogo.

Ajisüaka US State Department-i Azerbaijan ya "Special Watch List" nung ang züngok.

Tesüiba küm aika Armenia aser Azerbaijan na tsüngda Nagorno-Karabakh region atema raaa aruogo. 2022 küm December ita nungi Nagorno-Karabakh aser Armenia na sendaktepba lenmang Lachin Corridor ita 9 mokdangba mapang Armenia nung kanga timtema liasü.

AO OSHI ANGAZÜKDAK: TANÜ ANGAZÜKTSÜBA OJANG



Talenlenpi

(v) alu aser aen lenmang merükteta inyakba ( path repairing)

\* Yimkong talenlenpi anogo nung nisung aika aru.

Talenwalok

(n) alu lenmang tasen meshitetba ( dedication of new pathway)

\* Yimer talenwalok nü pastorba jaa sarasademdaksü.

OLONG PAITEP # 6892

Grid for crossword puzzle #6892 with numbers 1-17.

TIPIEN

- 1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6891 TELANGZÜBA

TIPIEN :

- 2. Anatsü, 6. Nüji, 7. Aputak,
9. Lung, 10. Lenir, 11. Aben,
14. Langzü, 16. Aket, 17. Süsang.

LANGTSÜNGLEN :

- 1. Pokpo, 2. Ajet, 3. Atak, 4. Senyur,
5. Mit, 8. Asen, 9. Liwa, 10. Leptsü,
12. Azüok, 13. Nao, 14. Lasa,
15. Menungra.

NAI-A YA METETTER MA



Mangaluru nung arishi küm 13 tain Hadrian Vegas-i world record tasen ka yanglutetogo aser ibaji second 37 nung underwater somersaults 26 ben sütetba lir. Emmekere International Swimming Pool nung pai iba alima otsü tasen yanglu aser Nobel World Records State Director Dr. Krishnamurti-i kuli agütsüogo. Hadrian ya Carmel CBSE School nung Class 8 kaketshir ka lir aser pai pa coach Aromal A.S lenisüba kübok iba otsü yanglutet.

Mizoram-Assam arrtsü ken o angatetteptsü: CM Lalduhoma



Aizawl, August 10, 2024 (Agencies): Assam den arrtsü ken o angatetteptsü aser arrtsülen tensa süngjema akümtsü ta Mizoram Chief Minister Lalduhoma-i ashi.

Assam nungi teshimtet telok ka den senden ka amendang state anaprongnungi lennirtemi yimjung atema külemi inyaksü tejangraba lemsatep. State ana tsüngda arrtsü ken o angatetteptsü atema parnoki bangjemtep.

"Ozü sorkari iba kümsük

nung inter-state boundary ken o angatettepnür" ta Lalduhoma-i ashi.

Assam aser Mizoram tsüngda arrtsü ken o angatetteptsü nükjidong nung August 10, 2024 nü Assam nung Border Protection & Development Minister Atul Bora-i Mizoram Chief Minister Lalduhoma den ajurutep.

Iba mapang Chief Minister Lalduhoma-i küm aika state ana tsüngda ken o ashishitepba

aruba atema tebilemstsü abenba lemsatep.

Tesüiba mapang olemtep balala agiba ajanga status quo nung lir saka iba ajanga teti atema telemtetba ka magitet, ta pai ashi.

"Asenoki status quo nung aliba ajanga teti atema lemtet ka magiteter anungji ozü party sorkar kümsük mapang iba ken o angatetteptsü tenangzüka lir" ta Mizoram CM Lalduhoma-isa ashi.

Bangladesh nung Hindu nunger anema inyakba atema lungkak ait

Samguri, August 10, 2024 (Agencies): Bangladesh nung Hindu nunger reshikangshiba atema Assam nung Hindu teloktemi lungkak aiter.

Sanatani Hindu Samaj züngsem 50 temai tan Amoni nung lungkak aitba sentong ka agiogo. Iba tesem ya Nagaon district kübok Samguri nung lir.

Lungkak aitertertemi Bangladesh President aser

Army Chief na mesüka yanglur rongdok aser 'Jai Shri Ram' ta ayimten.

Assam nung Left teloktemi ola madokba atema parnoki aitsü aser Left teloktemi Hindu nunger reshikangshiba atema süoki ia mebilemer ta ashi.

Bangladesh nung mepetmesü ya kaketshirtemi dang masü saka fundamentalist groups ajanga mapa inyakba

ajanga tuluba kümogo. Anungji India Prime Minister-i lemtet tajung ka agitsüla aser Hindutva kümzüka ayutsü atema Bangladesh nung military operations inyaksüla ta Sanatani Hindu Samaj-i takhangba agütsü.

Iba lungkak aitba tesem nung tensa süngjema alitsü atema Kaliabor subdivision nungi police telok ka yok.

HYC-i Shillong Civil Hospital nungi OST centre belentsü akhanger

Shillong, August 10, 2024 (Agencies): Shillong Civil Hospital telongtet nung Oral Substitution Therapy (OST) Centre belentsüla ta Hynniewtrep Youth Council (HYC)-i takhangba agütsüogo.

OST Centre aliba ajanga yimya tamajung beshiba, auyaba aser centre-i arurtemi tensa raksaba osangtem lir ta HYC-i ashi.

HYC-i bushisüngdanga aodang auer kar apu aser parnok ya OST Centre-i

aruba drug addicts lir ta nangzüko.

Shillong Civil Hospital nung tiptema alitsü aser security atema Director of Health Services-i iba Centre tangaleni belentsü ayongzüker ta HYC-i ashi.

Delhi & NCR Kuki kaketshirtemi Separate Administration meshir

Imphal, August 10, 2024 (Agencies): Honibarnü Delhi nung Kuki Students' Organisation Delhi & NCR (KSOD&NCR) ajanga lungkak aitba sentong ka ayonga agiogo aser iba sentong nung parnoki Manipur nung Kuki-Zo nunger atema Separate Administration amenoktsü takhangba agütsü.

KSOD&NCR-isa Centre sorkari Assam Rifles agientsü lemtet meyipa agitsü takhangba agütsü.

"Manipur nung Meitei nungeri aniba sorkar kübok Kuki-Zo nunger reshikangshir. Chief Minister N. Biren Singh-i Kuki-Zo nunger anema inyaksü ajungmesor aser bendanga amshir" ta KSOD&NCR-i Prime Minister Narendra Modi dangi züluba memorandum nung shia lir.

"Manipur nung Kuki-Zo



nunger samatsütsü meranger aser state sorkari onok züngdoker. Chief Minister Biren Singh-i o tamajung jembia ozüng alema inyaksü ajungmesor anungji Puducherry model ama Union Territory with Legislature amenoktsüla" ta KSOD&NCR-isa ashi.

"State sorkari Kuki-Zo nunger kümzüka meyteter. Ano Centre sorkari buffer zones

nungi Assam Rifles agientsü lemtetba atema tebilemstsü abener" ta parnokisa ashi.

"Prime Minister-i item onük asoshi mapa inyaksü ayongzüker kechiyong Separate Administration ka amenok nung dang onok taküm liyonga otettsü aser kasa terenlok anguba den sobaliba wazüka yutettsü" ta KSOD&NCR-isa ashi.

# US-i Israel nem military teyari USD billion 3.5 agütsütsü

**Washington, Luroi/August 10 (Agencies):** United States-i Israel nem ano military teyari billion 3.5 talila yoktsü, ta Department of State-i shiogo. Gaza nung ita ter tashi maneni raraba mapang Israel nung military inyakym meshidakba atema taitüba aika adoker aliba mapang ka nung tang iba teyari agütsütsü sangdongogo.

State Department otongdar-i Hokolbarnü ashiba agi, Biden administration-i, Israel nem USD billion aika alang teyari agütsütsü atema tebilemba aliba Congress nem Brehostibarnü metetdaksügo.

US broadcast media-i senotsü teyari agütsütsü aliba indang ya mezüng sangdong, koba Congress-i April ita agizüker aliba USD billion 14.5 alang supplemental funding bill ka nungi lir. US military-i kümshia Israel nem USD billion 3 dak tema teyari agüja aruba den ano supplemental budget ya agütsür.

Tang teyari agütsütsü nangzükba rongnung shilem ka Israeli military unit ka dangi aotsü, shirnok West Bank nung Palestinians nung anema inyakshiba atema aija arudar.

State Department-i ashiba agi, parnoki iba unit nem tenokdangba magütsütsü asoshi telemtetba agiogo. Israel-i iba unit inyakym meshidaki benoka inyakshiba bentettsü asoshi jenjang agiba agi parnok temulung süogo, ta State Department-isa shisem.

US-i yimjak nung iba unit tetshia mejembi, saka parnoki Israel indang Netzah Yehuda battalion indang jembir asütsü ta amanger, shirnok West Bank nung amendaker inyakshibia arudar.

Iba battalion aser züngsem kar Palestine nung civilian tem mezüng meshia amshiba dak sendaka lir, kong 2022 küm arishi küm 78 tain Palestinian-American nung ka iba unit-i

sota aliba mapang asüba densema lir.

Iba Israel nung indang battalion yagi Palestine nung meimchi temeden anema inyakshibia indang April ita tema adokba sülen US Secretary of State Antony Blinken-i parnok aitsü aser US military-i bendanger sepaitem nem teyari agütsüba dak sendakba nung US legislation kübok ken o ka bushisüngdang tenzüka liasü.

Battalion-i Palestine nungertem mezüngmeshia amshiba ngutetba dak sendakba nung Republican MP temi iba anema nokdakba mapang Blinken-i ashiba agi, aibelen bentettsü atema Israel nem mapang agütsütsü asoshi iba unit nem maneni teyari agüja atadaksütsü.

Gaza rara nung Palestine nung civilian meyirejang aika tepsetba ajanga Israel aitsüba tali küma aoba mapang ka nung Blinken-i pa tamendakdak melenshiba indang osang sangdongogo.

Gaza aser occupied West Bank naprongla nung Palestine nung anema inyakshibia atema Israel military aija arudar, kong nisung aliba ki, mozüki, school tem maka civilian tem tepsetba, tepuokertem rishikangshiba aser pei talidak toktsür jenshia or aliba Palestine nung meyirejang aika nem tzü, chiyongtsü aser mozü supply magütsüi nokdanga ayuba densema lir.

Tawa Israeli prison camp ka nung Palestine nung tepuoker ka dak shi nung tashiyim agi medemba atema Israel nung sepai 10 aitsüogo, koba video nung pua liasü.

Kasa mapang nung Israel-i Gaza yimti nung nüburtem jenoka aliba school ka amakba sülen Palestine nung 100 dak tema tepsetogo aser nisung aika yiruja liasü, ta Palestine nung ketdangsurtemi metetdaksü.

Israel-i Honibarnü Daraj

district nung amekdaker aliba al-Tabin school nung bomb asem pokloksü, ta Gaza indang civil defence agency-i metetdaksü.

Asürtem rongnung tanur, tetsür aser tantsür tamburtem densema liasü, ta ashiba den lendong nung asür timba akümtsü imlar. Nüburtem anepdang sarasadema aliba mapang bomb ya pokloksü aser iba ajanga ki nung mi adoka liasü.

Khan Younis nungi Al Jazeera osangbener Hani Mahmoud-i ashiba agi, iba tesem amakba ya asa civilian tem amakba dang masü saka nüburtem külem küja anema inyakshibia maparen ka lir.

Gaza indang Government Media Office tekolakba Ismail al-Thawabta-i ashiba agi, Israel-i seret 907 shi asütsü ta bilemba bomb asem amshia iba tesem amak.

Paisa, iba school nung nüburtem jenoka lir ta Israel-i jangja liasü, ta ashi.

Israeli military-i ashiba agi, air force-i command & control centre ka amak, koba Hamas pur aser parnok indang commander tem jenoka aliba tesem ka lir.

Kuli agüja Israel military-i ashiba agi, itangitertem osang ajanga iba school nung amendaker Hamas aser Islamic Jihad fighters pur 20 shi inyakshibia liasü, kong commander tejentema densema liasü.

Military-isa, Palestine nung ketdangsurtemi civilian tem asüba idang osang agütsüba ya alimela agütsüba lir, ta ashi.

Israel nung sepaitemi tejenokdak ama amshiba school tem aika maka arudar aser ashiba agi, item school tem ya Hamas pur indang command centre tem lir.

Honibarnü iba school amakba densema Israel-i iba amala mesükba tesem pezü makogo. Ajisüaka item school tem ya Hamas puri amshi ta Israel-i kuli kecha agüja mali.

## MULUNGNEN O



Aso : 1961

Asü : 05-08-2024

Asür Yashimenla

Onoki meima aliba asür YASHIMENLA shirangba anogo nungi tenzüker tasüba anogo tashi nung ana aser talang nungi kija, kibong, Arogo kiyonger aser temeimertem kwikati ozü asükho nung nübu, rongsen, sarasadem aser shisatsü agi yaritepogo, nenok ajak dang onoki kanga pelaba lemsateper.

Tsüngremi nenok ajak maneni moajangma.

-Temeim kinungbo, Chirnur, Semchir, Anükapang aser Kinungertem.

## PUBLIC NOTICE

**ICICI Bank** Registered Office: ICICI Bank Tower, Near Chakli Circle, Old Padra Road, Vadodara- 390 007  
Corporate Office: ICICI Bank Towers, Bandra-Kurla Complex Mumbai 400051

### GOLD E-AUCTION CUM INVITATION NOTICE

Teküboklen shisema aliba sen apurtem dang hon ornaments aliba atema facility nem agütsütsü aliba sen agütsütsü tetuyuba agütsüogo. ICICI Bank Limited ("ICICI Bank") nungi parnoki agiba ("Facility"). Parnoki due maotet asünung August 20, 2024 nü pledged gold ornaments atema E-Auction ka agütsüba kumogo. ICICI Bank dak jelia osang magütsüi account agütsü, E-Auction anogo melentsü tashi lir. Auction ya online -https://jewel-auction.procuretiger.com ajanga 12:#) nungi 3:30 ako tashi nung agütsü. Terms and conditions atema osang tejangjaba agütsü asoshi agüja aliba website-i log in süang. Sen apur suatoker lira condition ajak legal heirs dak benoka inyakshibia.

Loan A/C No.	Customer Name
Branch Name: Dimapur	
047605001010	Ajay Kumar
04760500097	Md Javed Sarwar
047605000904	David Pochury
047605001056	Balaraj .

Date : 10.08.2024  
Place : Dimapur

S/d  
Authorised Officer  
For ICICI Bank Limited

## Bangladesh chief justice-i mapa nungi anentsü mulunga agizükogo

**Dhaka, Luroi/August 10**

**(Agencies):** Longkak aitertemi tezüluba nung takhangba ka agütsüba sülen Bangladesh nung okadak tongtiba indang chief justice-i pa mapa nungi anentsü mulunga agizükogo. Ato Kilonser Sheikh Hasina India-i jena aoba sülen anogo ishika lir tang iba ya atalokogo.

Obaidul Hassan, shiba taoba küm Supreme Court chief justice asütsü shima liasü aser Hasina den kanga junga sendaktepa alir ka ama züngshir, pa dang longkak aitertemi Honibarnü pa mapa nungi anentsü takhangba agüja liasü.

Al Jazeera osangbener Tanvir Chowdhury-i Dhaka nungi ashiba agi, Hassan-i ayongzüka Appellate Division indang justices den senden ka mender ta osang angazükba sülen kaketshirtemi yimtung nung longkak aittsü telemtetba agia liasü.

Hassan-i mapa toktsütsü atema telemtetba agiba formal shiti ka tir Mohammed Shahabuddin den sensak asema sülen agütsütsü imlar. Suprem Court-a politicize sütettsü ta kaketshirtemi bilemer aser SC nung tanungba züngsem tenet jia mapa nungi anendaktsüner, ta Chowdhury-i ashi.

Awami League party lenir Hasina, Hombarnü helicopter ka nung India-i jena ao. Lai aniba sorkar ya meimchir temeden anema inyakshibia atema aitsür lir, kong la anemertem meyirejang aika



Obaidul Hassan

tepsetba densema lir.

Hasina ajugbena jena aoba ajanga Cabinet minister tem taolen makai kumogo aser kasa mapang nung ketdangsur tongibangtem aikati office toktsüogo, kong national police tekolakba aser central bank governor densema lir.

Hokolbarnü bank indang governor, Abdur Rouf Talukder-i mapa tokja liasü. Longkak aitertemi central bank indang headquarters-a dena maka liasü.

Muhammad Yunus, shibai 2006 küm Nobel Peace Prize ngua liasü, pai transitional sorkar ka anir inyakshibidar, koba kaketshirtem takhangba ka liasü.

Yunus-i, Brehostibarnü caretaker administration indang "chief adviser" mapa agizükogo. Pai ita ishika tsüngda election aginer ta shiogo.



Hokolbarnü Vinhedo, São Paulo nung tayimtsü ka tsükokba sülen tayimtsü nung mena alir 62 prongla süogo. Voepass meyong tayimtsü ya Cascavel, Paraná, nungi São Paulo kübok Guarulhos International Airport-i oya aliba mapang 1:30 ako shi nung tsükoka liasü.

## Barcelona-i RB Leipzig nungi Olmo alizükogo



Dani Olmo

**Luroi/August 10, 2024 (Agencies):** Barcelona-i Spain nunger playmaker Dani Olmo, Germany club RB Leipzig nungi alizükogo.

Arishi kum 26 tain asayar ya euro million 60 yong Barcelona-i meyipa aruogo, ta osang ajanga metedaktsü. Pa youth level nung Barcelona nungi asayaba sülen 2014 kum Croatia indang club Dinamo Zagreb nung oa

dena liasü.

Olmo aser Barcelona kum trok atema tenangzüktepba ka yangluogo aser pa indang release clause euro million 500 asütsü.

Euro 2024 asayaba mapang Olmo ya Spain nunger asayatem rongnungi tajungtiba ka liasü aser pai goal asem idakja goal timtiba idaktsürtem rongnung denesema liasü. Iba

asayamung ya Spain-i pezübenbuba kokogo.

"Olmo kongsa asayadir asayaka pa tangar dang nungi balaka asür, kechiyong pa sempet tajung aketba asayar ka aser pa dak team-mates tem den sendaktepa asayatsü sempet tajung lir," ta Barcelona-i sangdong ka ajanga metedaktsü.

"Pai goal idaktsütsü asoshi meranga asayar aser aji Euro 2024 nung pai sayuogo aser pai penalty area telung aser tema naprongla nungi goal idaktsüteter," ta kasa sangdong ajanga metedaktsü.

Olmo-i RB Leipzig nungi asayaba mapang German Cup ana kokogo. Pa iba club nung 2020 kum dena liasü.

"Club tasen aser lanur asayar ka. Onok külemi ina atu, mezübuba trophy külemi akok aser külemi otsü tasen yangluogo," ta Olmo-i ashi.

"RB Leipzig dang kanga pelar. Iba club kü mulung nung teti alitsü," ta Olmo-isa ashi.

## 17th Imchaba Master Memorial Nagaland Open Volleyball Trophy Sept 17 nungi asayatsü

**Mokokchung, 10th Aug (TYO):** Mokokchung District Volleyball Association-i ayongzuka 17 buba Imchaba Master Memorial Nagaland Open Volleyball Trophy Sept 17-20 asayatsü lemtetogo ta MDVA sangdong ka ajanga metedaktsü.

Iba asayamung nung takoker mezung, tanabuba, tasembuba aser pezübuba nem senpet sen Rs. 1,00,000/-, Rs. 70,000/-, Rs. 30,000/- & Rs. 20,000/-

senpetsütsü. Iba den nija senpet - Best Spiker, Best Setter & Player of the Tournament shima nisung shia nem senpet Rs. 5000/- (each) agütsütsü. Final four atongertem dak alaka shilem agir telok ajak nem shilem agiba teyari Rs. 5000/- agütsütsü. Iba dak alaka tanga district nungi arur telok nembo Travel Allowances dena agütsütsü ta tayongertemisa metedaktsü.

Tejangrar telok-i Lim Counter

(Kohima, Mokokchung & Dimapur) nungi form agizüktsü mepishir aser form-ji 20th Aug, 2024 nungi lemshitsü. Form meyiptsütsü tatembang anogoji 13th Sept, 2024 asütsü. Iba asayamung dak sentakba nung osang tejangria metetnürtemi organizing committee convenor: 7005431383; technical committee convenor: 9612938723; aser MDVA president: 8132865806 den tongtepratepttsü.

## West Ham aser Todibo na tenangzüktepba yangluogo



Jean-Clair Todibo

**Luroi/August 10, 2024 (Agencies):** West Ham United-i season ka atema loan nung Nice defender Jean-Clair Todibo anir aruogo aser pa ya 2025 kum pound million 34.22 agi alizüktsü atema lenmang sadema lapoka yuogo.

Todibo den tenangzüktepba yanglutsü atema Julien Lopetegui-i aniba club ya Italian club Juventus den toktepa liasü. Todibo tang tashi nung France team nungi anaben asayar lir.

"Premier League nung asayatsü maongka anguba ya nukjidong atalokba ka lir, koba alima nung league tajungtiba lir," ta Todibo-i ashi.

Osang ajanga ashiba agi, West Ham United puri parnok

defence akangshitsü atema Manchester United nungi defender Aaron Wan-Bissaka alizüktsü atema sensaksem dar aser tawa sensaksem kanga junga odar.

Full-back asayar ya Honibarnü Manchester City den Wembley nung Community Shield asaya atema Manchester United squad nung züngoksema maliasü. Erik ten Hag-i ashiba agi, pa yirur taneptsü junga mongui aliba ajanga team nung mezüngoksem.

Todibo ya Toulouse indang academy nungi anitetba asayar ka lir aser iba sülen pa 2019 kum Barcelona nung dena liasü.

Schalke aser Benfica nungi loan nung oa asayaba sülen pa

2021 kum Nice nung dena liasü.

Todibo densema West Ham puri takum asayar trokbuba alizükogo, kechiyong David Moyes-i club toktsüba sülen technical director Tim Steidten-i team yanglushiba mapang ka lir.

"Todibo den tenangzüktepba yanglutsü atema Europe nung club balala tejangraba liasü aser pa amala asayar ka shiba pa indang career nung temaba jenjang atongtsü ana nung lir pa anir arutsü atema board nongita yariba atema kanga pelar," ta Steidten-i ashi.

Club-i tang tashi nung Leeds nungi Dutch forward Crysencio Summerville, Borussia Dortmund nungi Germany striker Niclas Fullkrug, Palmeiras nungi midfielder Luis Guilherme, Wolves nungi defender Max Kilman aser Argentina nunger midfielder Guido Rodriguez atema pound million 100 dak tema intokogo.

West Ham pur 2024-25 Premier League nung mezüngbuba asaya August 17 nü Aston Villa den asayatsü.

## BCB-i Bangladesh army dang security meshi

**Dimapur, Luroi/August 10 (Agencies):** Tetsür T20 World Cup koba October 3 nungi 20 tashi asayatsü lir, iba atema Bangladesh Cricket Board-i Bangladesh Army tekolakba dang parnoki security tapet agütsütsü ta tenangzükba ka meshiogo. Ato Kilonser Sheikh Hasina atstungtokba sülen linük nung tang mepetmesü tulu adoker lir.

Bangladesh kübok Sylhet aser Mirpur yimti nung tetsür T20 World Cup ayongzuka asayatsü renemer lir. Bangladeshi army chief of staff, General Waker-Uz-Zaman-i, security dak sendakba nung tenangzükba ka meshia BCB nungi shiti ka agizükogo, ta Cricbuzz sangdong ka ajanga metedaktsü.

September 27 nü nungi tetsür T20 World Cup warm-up round tenzüktsü.

Sorkari anema nüburtemi longkak aita nisung noklang dak tema asüba sülen Ato Kilonser Hasina-i mapa toktsür jena aoba dak sendakba nung ICC-i tensa maneni asadanga arudar.

ICC-i, iba tetoktepa ya

tanga tesem kar nung ayongzuka asayatsü akok aser Sri Lanka, India, aser United Arab Emirates asandangdar.

Board director tem shirnok Awami League-i nongita yari asütsü ta bilemer parnok den tang BCB tir Nazmul Hasan Papon-a linük toktsür ogo.


Ajisiuka director kar Dhaka nung lir aser asayamung ya Bangladesh nungi belener maotsü timla nung parnok atatepdar.

BCB umpiring committee chairman Iftekhar Ahmed Mithu-i ashiba agi, "onoki iba asayamung ayongzuka asayatsü merangdar."

"Onok aikabo linük nung mali aser Brestobarnü onoki Army tekolakba nem shita ka agütsüogo. Onoki ICC Women's T20 World Cup mapang security tapet agütsütsü khanga shiti ka agütsüogo, kechiyong asayamung asayatsü ita ana dang anunga lir," ta pai ashi.

"Anogo ana tejakdang ICC-i onok den tongtepratepogo aser onoki takaratiba nung telangzüba agütsütsü ta shiogo," ta paisa shisem.

## Djokovic ATP Cincinnati Open nung masayatsü



Novak Djokovic

**Luroi/August 10, 2024 (Agencies):** Paris Olympic tebur kija asaya nung gold medal ngur aliba asayar champion Novak Djokovic-i pa taruba hopta nungi tenzuka asayatsü aliba ATP Cincinnati Open nung shilem magitsü telemtetba agiogo, ta asayamung ayongertemi metedaktsü.

World number two Djokovic, shiba otsüsütsüsa Grand Slam kija asaya 24 koker lir, pa taoba kum Cincinnati indang champion liasü, koba pai iba asayamung tasembenbuba akokba liasü.

Taoba kum US Open akokba sülen Djokovic-i tang tashi nung Grand Slam ka danga koka mali. Takum pa Australian Open semi-finals, French Open quarter-finals aser Wimbledon

final nung tsüka liasü.

Deobarnü pai Olympic final nung Spain nunger asayar Carlos Alcaraz koka mezüngbuba gold medal nguogo.

"Olympics nung takok ngua asayaba sülen Cincinnati-i arua asayatsüji karara asütsü ta onoki angateter," ta Cincinnati Open tournament director Bob Moran-i ashi.

"Pai taoba kum iba asayamung nung kanga junga asayaogo. Pa takaratiba nung asaya tenzüktsü yongya atar," ta paisa shisem.

Djokovic-i iba asayamung nung shilem magitsü atema telemtetba agiba sülen France nunger asayar Giovanni Mpetshi Perricard Cincinnati Open main draw-i iogo.

**BILEMDANGANG**

"Aremzuka inyakba nung temaotsü lir."